

Stichting Musica ta anuncia e banda musical ganado “Band of the Year”

Basa riba e criteria di Band of the Year cu Stichting Musica a bin ta anuncia anteriormente, un cuerpo di hurado distribui riba e rutanan di Carnaval a evalua cua ta e banda cu a contribui mas durante Carnaval 69.

E criteria tabata lo siguiente:

- E banda mester a participa na Aruba Caiso & Soca Monarch 2023 y/of Festival di Tumba 2023
- E banda mester a participa na entre otro e siguiente paradanan di Aruba su Carnaval 2023 (no ta necesario pa participa na tur parade): Parada di Luz San Nicolas. Lighting Parade Oranjestad, parade di Jouvert Morning, Parada Grandi na San Nicolas y e Grand Parade na Oranjestad
- E banda cu e miho animacion den paradanan
- E banda su zonido
- Presentacion di e banda su trailer den e paradanan
- E banda mester toca e Soca ganado di Aruba Caiso & Soca Monarch 2023 y/of e Tumba ganado 2023.

Stichting Musica ta anuncia Band of the Year 2023: **TSUNAMI**

Tsunami a destaca durante di e evaluacion di hurado y como Band of the Year 2023 ta gana e suma di Afl. 5000,- como premio. Por mira cu Tsunami ta haci nan maximo esfuerso pa mantene un bon calidad di zonido y presentacion, mientras cu nan ta duna bek na e pueblo den forma di goso y entretenimento.

Un pabien ta bay di parti Stichting Musica pa tur banda musical cu a participa na Aruba Caiso & Soca Monarch 2023 y tambe na e paradanan di Carnaval 2023. Aruba a disfruta di un tremendo temporada di Carnaval cu bunita costumes y excelente musica. Durante nos Grand Parade por a gosa di apariencia special di diferente artista popular, entre otro Derwin Kemp y Claudius Philips cu a deleita un y tur.

E Soca ganado a zona riba caminda y laga tur hende “Feelin’ Good, Feelin’ Nice” y asina Stichting Musica ta desea pa Aruba y e seno musical sigui te cu e siguiente temporada, positivo y yen di ambiente!

